

بِسْمِ اللَّهِ الرَّحْمَنِ الرَّحِيمِ



## Khutba Jummah

Hazrat Khalifatullah Munir. A. Azim (atba)

31 Juillet 2020

09 Dhul-Hijjah 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

### *Duahs (Invocations) (Pt. 4)*

C'est purement par la grâce d'Allah ki mo pé continuer mo Khutba aujourd'hui lors bane *duahs*. *Alhamdulillah, Summa Alhamdulillah*. Et c'est purement par So la grâce ki Li confirme mo véracité et consolide la foi (*Imaan*) de mo bane disciples kot Li donne zot bane inspirations, rêves, visions et bane révélations.

*Alhamdulillah*, dans le cadre de sa bane séries de Khutba Jummahs ki mo pé faire lors *duahs*, Allah fine manifester Li dans plusieurs façons à mo bane disciples pou montrer zot la valeur de *duahs* et aussi pou renforci zot la foi lors la Manifestation Divine de sa siècle là. Vendredi dernier le 24 Juillet 2020, ene évènement spirituel bien important fine manifester kan mo très cher disciple Naib Amir Saleem Sahib de Tamil Nadu ti pé faire Khutba Jummah et ti pé lire le Khutba Jummah ki mo ti faire le 17 Juillet 2020 lors *duahs*.

So madame, Fatima Jasmine Sahiba pendant le Khutba Jummah fine trouve dans l'état de vision (*Kashaf*) ene personnalité imposant ki ti pé deboute exactement derrière Saleem Sahib. Li ti bien grand avec beaucoup cheveux lors so la tête. Jasmine Sahiba ti bien étonner pou trouve li, mais sa personnalité ti bien plaisant.

Ensuite, li fine senti so l'âme (*Ruh*) demande sa personnalité là : « **Ki sanlà ou ?** »  
Alors, sa personnalité là fine réponde li : « **Allah fine envoie moi. Mo ene Malaq (ange) ki Allah fine envoyé pour protégé zot tous.** »

Alors, li fine étonner et so garçon fine bouge li et après li pas fine trouve sa ange là. Li ti croire ki sa ti so imagination. Mais après, li fine ré-tende sa la voix là encore ki fine dire même z'affaire, et alors li fine bel et bien sûre ki sa fine bien passé [arrivé], ki sa c'est pas so imagination. Après, so bane zenfants aussi fine rapporté ki zot aussi fine trouve sa ange là. *Alhamdulillah*. C'est ene très grand expérience spirituel ki zot fine gagner. *Masha-Allah. Allahu Akbar...*

En vérité, la promesse d'Allah Li toujours vrai. C'est mo *duahs* tous les temps ki Allah accorde So protection à tous mo bane disciples sincères, ki ena ene *Imaan* (la foi) solide lors Allah et So Khalifatullah de sa siècle là. Ki Allah continuer manifester Li pou donne courage and renforci la foi de mo bane disciples et pas faire zot perdi courage dans bane moments difficiles, et pour ki zot remercier Li toujours, que ce soit dans bane moments difficiles, et bane moments de joie aussi.

Le monde pé faire face beaucoup problèmes. Ô mo Allah! C'est par To l'amour ki To ena pou moi ki To pé montrer moi à travers révélations, bane grands, grands difficultés, problèmes, problèmes économiques mondiale, perdi l'emploi, beaucoup chômeurs, crimes, voles, et kot violes pou faire ravage dans quatre coins du monde, jeunesse pou touye zot parents pou gagne l'argent ou dibiens pou alle droguer, bane calamités dans tous façons, la guerre de pouvoir, disang pou couler couma dire la rivière de l'eau. Ena pays pou mort sans manger, boire, pas pou ena nourriture ; médicament lors marché pas pou suffit [pou vende médicaments dans marché noir], kot beaucoup pou mort, à cause bane maladies.

Bane soi-disant grand pays pou continuer faire dominare avec bane ti pays, bane pays faible. Pou ena bane virus encore ki pou attaque bane z'animaux aussi, et pou attaque l'homme. Et aussi pou ena ene virus ki pou attaque bane zenfants en-bas âge. Bane pays ki l'ennemi de l'Islam pou faire bane musulmans vine zot cibles, pou persécute, torture zot. Pou ena partout bane grands inondations kot des milliers pou mort et bane grands tremblements de terre, des milliers et des milliers pou mort, crash avion, et bateau faire naufrage ; combien la vie pou aller ! Pou ena fraude, corruption, la guerre de pouvoir, bane élections maldonne.

Ô mo Allah! Kan To fine révèle moi sa et céki To fine montrer moi dans *Kashaf* et rêves, mo lécoeur dans la peine à cause sa bane problèmes là. Mo la vie prêt pou sorti à cause sa souffrance là. Sa la force ki mo ti ena là, mo népli ena aucaine la force. Toi Qui le Maître de l'univers, éloigne nous avec tous sa bane zaffaires ki pé vini encore là, éloigne sa grand la peine là de nous.

Ô Allah! Sa aussi To fine montrer moi ki avec sa bane zaffaires ki pou arriver là, très peu zhommes ki pou vivre et pou ena pli beaucoup madames et filles et To fine donne l'instruction couma pou bizin encadrer sa bane madames et filles là, protège zot l'honneur et dignité, kot sans To aide li pas pou ene travail faciles.

Ô Allah! De nos jours, d'après bane statistiques bane madames pli nombreux ki missiés.

Ô Allah! Avec encore céki derrière la porte ki ene coup capave éclater, seulement Toi ki conner, sa 3<sup>ème</sup> guerre mondiale là kot sa pou pli violent. La misère noir pou à travers le monde. Toujours bane ki ena ene ti moyen, faire stock nourritures, parceki avec sa la guerre là, marchandise de baze pas pou gagner, ni bateau ni avion pas pou capave amène marchandises. Faire stock kot moments difficiles ou capave aide celui ki péna et là aussi beaucoup zhommes pou perdi la vie, pou ena beaucoup madames veuve, zenfants orphelin etc.

Ô Allah! To fine montrer moi ki sa siècle là ene siècle dès so commencement ena bane souffrances et li pou continuer jusqu'à so finale. C'est ene siècle pli dur pou l'humanité en générale.

Ô Allah! Combien dimounes à travers le monde pou croire moi céki mo pé dire ? Combien pou vire lé dos avec sa bane messages là ?

Ô Allah! C'est vrai ki To fine donne moi permission pou faire certaines kitchoses, mais combien pou croire moi là-dans et combien pou humilier et mette bane blâmes et accusations gratuits lors moi.

Ô Allah! Augmente acceptation de mo bane *duahs* et amène To grâce et sappe moi et tous céki avec moi, de tous sa bane la peines et souffrances là.

Ô Allah! Aide-moi dans mo bane travaux et pas mette moi dans bane épreuves.

Ô mo Allah! Mo ena ene *duah* ki mo soumette devant Toi ; donne moi tout céki fine rempli dans mo lécoeur, ki mo la langue pas pé capave exprime sa bane paroles là, à cause de pudeur et la honte.

Ô Allah péna nannié devant To puissance.

Ô Allah! Délivrer tous céki avec moi de tous kalité malpropreté et de l'esclavage de bane les autres dimounes.

Ô Allah! Faire ki zot tous vivre heureux tout le temps et sappe zot d'ene mauvais la vie et faire zot tous écoute et coopérer avec moi pou faire le travail de la religion.

Ô Allah! Sappe zot la caze de *Dajjal*, sappe zot tous avec bane la peines et pas faire zot gagne souffrance.

Ô Allah! Mo faire *duahs*, ki sa l'époque là pas arriver, ki zamais zot pas quitte To chemin, ki To fine mette zot ; arrive céki arrive, zot reste toujours ferme lors To chemin et reste toujours dans la Manifestation Divine.

Ô Allah! Peut-être zot pas pé prend sa assez en considération et réfléchi lors là, ki dimounes pas manquer dans sa le monde ki To fine créer là, et To fine choisir zot pou mette zot ici dans sa bateau ki pou amène zot directement vers Toi. Et si zamais zot pas montrer aucaine reconnaissance pou sa grand faveur ki To fine faire zot dans sa siècle là, si zot pas conne so l'importance et couma zot différent de bane les zot, bé Ô Allah, mo conner Toi ki possède le tout pouvoir et To Puissant, To capave enlève sa grâce là de zot et remplace zot par bane dimounes pli humble, reconnaissants, ki pou sacrifier tout zot la vie, zot l'honneur, zot di biens pou propage le message de la Manifestation Divine dans quatre coins du monde et aussi pou travail nuits et jours pou To religion (*Deen*).

Ô Allah! Sa même l'espoir mo ena lors Toi. Pure est Celui Qui fine décevoir mo bane l'ennemis.

Ô Allah! Li ene très grand faveur ki To fine faire lors moi.

Ô mo lé Roi ; de quel façon mo pou remercier Toi ? To fine toujours là avec moi. Chaque partie de mo le corps sacrifier pou Toi ; de la tête jusqu'au pied ena To

bane faveurs lors moi. Tout les temps To bane faveurs du ciel fine tombe lors moi couma la pluie, To fine faire beaucoup faveurs lors moi et To fine installe moi lors trône. To fine faire faveurs lors moi dans *Deen* et *Duniya* aussi ; kot mo pou gagne sa la langue avec laquelle mo remercier Toi là ? Mo ene nannié du tout et To bane miséricordes zot beaucoup de par To la grâce ; sappe moi avec toutes sortes kalité difficultés, moi et tous céki avec moi ki fine attrape Toi avec sincérité du cœur.

Ô mo Bien-aimé, faire tout céki sincères avec moi, ki avec zot liziés même zot trouve To visage éclairer. Pas montrer moi zot difficultés, mo pou bien affecter pou zot, kot sa pou troubler moi. Pardonne zot bane péchés et n'importe quel désobéissances ki zot ena, faire *fazl* (grâce) lors zot afin ki zot pas vine bane lé ver, bane germes de sa le monde là, faire ki sakaine d'entre zot connu comme bane obéissants envers Toi.

Ô Allah! Sa désire ki mo ena là, li pas pou capave accompli par moi sa ; li pou seulement possible kan tous vine de Toi, c'est To même To Royaume ki ena lors le ciel et la terre et c'est To même Qui dirige tout.

Ô mo Bien-aimé ! Bane patience ki mo ti ena avant, maintenant mo péna li ; mo perdi patience trop vite.

Ô Allah Le Gracieux ! To nom li Rahman ; donc sappe moi de bane problèmes.

Ô mo Maître ! Tout les temps sappe moi de tous bane épreuves, bane misères, bane maladies. Donne moi la force, l'énergie et ene la vie pou ki mo continuer To travail jusqu'à terme [mo l'heure] arriver [kot mo pou bizin retourne vers Toi].

Ô Allah! Partout c'est To l'ordre ki régner ; sa la vie là aussi pou Toi et le temps aussi pour Toi.

Ô Allah! Lave moi de toutes impuretés et de toutes pratiques impures; donne moi la force, courage, détermination dans la Manifestation Divine. Guide moi vers la piété par To soutien, Ô Toi Qui la prunelle de liziés de bane indigents.

Ô Allah, accorde moi la sincérité, élargis mo la poitrine avec ene repentir sincère.

**Yaa Amaanal khaa-ifeen**, Ô Refuge de bane ki gagne peur. Ô Allah! Donne moi la force pour observe To bane l'ordres, encourage moi par To générosité et ki mo

reste toujours remercier Toi ; pas faire moi vine ingrat. Garde-moi sous To protection et sous To voile.

Ô Allah! Faire moi ene faveur ki vine de Toi ki mo être bon envers bane orphelins et donne moi sa opportunité là pou ki mo capave aide zot d'après mo moyen et faire moi aussi généreux envers bane affamés et faire moi gagne sa capacité là pou établir la paix partout et faire zot tous vivre en harmonie et tranquillité.

Ô Allah, réserve pou moi ene part de To grand miséricorde ; guide moi vers To bane preuves éclatantes et dirige moi vers To grand satisfaction, par To l'amour ki To montrer pou To bane serviteurs choisis.

**Et pou terminer mo récite sa *duahs* là : « Allahoumma inni asaloukal jannata wa maa qarraba ilayha min qawlin aw' aamalin wa a'oudhou bika minan-naari wa maa qarraba ilayhaa min qawlin aw' aamalin wa asalouka an taj'aala koulla qadain qaday-tahou li khayran. »** [Ô Allah! Mo demande Toi paradis et céki pou faire moi rapprocher avec li comme paroles ou actions. Mo cherche protection avec Toi contre l'enfer et céki pou rapproche moi avec li comme paroles et actions. Et mo demande Toi, Ô Allah, ki li bénéfique tout c'est ki To fine décider pou moi.]  
**Ameen, Summa Ameen.**

*Insha-Allah*, ki Allah (swt) donne moi le *Tawfiq* pou continuer mo Khutba lors bane *duahs* la semaine prochaine.

Dans le cadre de Eid-ul-Adha, mo tenir à souhaite tous mo bane frères, sœurs, et enfants musulmans de par le monde, ainsi ki tous mo bane disciples ene **EID-UL-ADHA MUBARAK !**

Mo tenir à remercier tous mo bane disciples ki fine envoye zot l'argent Qurbani dans Comores et Madagascar. *Alhamdulillah*, nous bane frères et sœurs de Madagascar et Comores fine téléphone moi pou remercier tous bane ki fine envoye zot l'argent Qurbani et zot faire *duahs* pour sa bane là. Ki Allah accepter tous zot bane sacrifices, et garde zot en bonne santé et donne zot ene longue la vie pour servir So cause. Ki Allah imbibe dans sakaine d'entre nous, l'esprit de sacrifice de Hazrat Ibrahim (as), ainsi ki l'esprit de sacrifice de Hazrat Ismaïl (as) et Hazrat Hajra (ra). *Insha-Allah*, demain le 01 Août 2020 mo pou adresse le sujet dans mo Khutba Eid-ul-Adha. **EID-UL-ADHA MUBARAK !**